

摘藻堂四庫全書薈要

集部

欽定四庫全書薈要卷一萬五千五百九十五

集部

誠齋集卷十八

宋 楊萬里 撰

詩

南海集

登南州奇觀前臨大江浮橋江心起三石臺  
皆有亭子

海邊樓閣海邊山銀漢初收霽日寒  
看着南州奇觀了

人間山水不須看

玉壺冰底卧青龍海外三山墮眼中  
竒觀揭名渾未只在  
只消題作小垂虹

平賊班師明發潮州

不是潢池赤白囊何緣杖屨到潮陽  
官軍已掃狐兔窟  
歸路莫孤山水鄉便去羅浮參玉局  
更登浴日折扶桑  
還家兒女搜行李滿袖雲烟雪月香

潮陽海岸望海

動地驚風起海陬為人吹散兩眉愁身行島北新春後  
眼到天南最盡頭衆水更來何處著千峰赴此却回休  
客間供給能消底萬頃烟波一白鷗

除夜宿石塔寺

醉後先眠客莫嗔誰能守歲費精神幸無爆竹驚寒夢  
休羨椒花頌好春今歲明年纔隔夕人情物態頓趨新  
遙憐兒女團欒處止欠屠酥第十人

每飲屠酥  
予居第十

壬寅歲朝發石塔寺

曉鐘夢裏苦相呼強裹烏紗照白鬚只有銅爐燒柏子  
更無玉盞瀉屠酥佛桑解吐四時豔鐵樹還如九節蒲  
省得一朝疲造請却教終日走長途

寺法堂前有紅佛桑四時有花又有

小木名鐵樹葉似筍而紫幹似密節莖蒲

### 晨炊黃岡望海

望中雪嶺界天橫雪外青瑤甃地平白底是沙青是海  
捲簾看了却心驚

### 海岸沙行

海濱半程沙上路海風吹起成烟霧行人合眼不敢覷  
一行一步愁一步步沙痕沒芒屨不是不行行不去  
若為行到無沙處寧逢石頭齧足拇寧踏黃泥濺袍袴  
海濱沙路莫再度

榕樹

直不為楹園不輪斧斤亦復赦渠薪數株連碧真成菌  
一脰空肥總是筋

食車螯

珠宮新沐淨瓊沙石鼎初燃瀹水花紫殼旋開微滴酒  
玉膚莫熟要鳴牙  
牙棖拖金線成雙美薑擘糟丘總一家  
老子宿醒無解處半杯羹後半甌茶

食螭房

蓬山側畔屹螭山懷玉深藏萬壑間也被酒徒勾引著  
荐它尊俎解酡顏

食蛤蜊米脯羹

傾來百顆恰盈奩剥作杯羹未屬厭莫遣下塩傷正味

不曾著蜜若為甜雪楷玉質全身瑩金線冰鈿半縷纖  
更淅香杭輕糝却發揮風韻十分添

食銀魚乾

初疑柘繭雪爭鮮又恐楊花糝作毡却是剪銀成此葉  
如何入口軟于綿

烏賊魚

秦帝東巡渡浙江中流風緊墜生書囊至今收得磨殘墨  
猶帶宮車載鮑香



泊流潢驛潮風大作

忽看草樹總離披  
記得風沙昨日時  
除却潮來無別事  
海風動地亦何為

潮來潮去有何功  
費盡辛勤辦一風  
若使無風潮自至  
信他海若有神通

正月三日宿范氏莊四首

開歲又涉三我征良未休  
沙行地一平百里縱遐眸  
景穆物自欣殫迫情反愁  
中田緬雲莊聊復稅我輶  
追程

有底急行急能至不三峯從何來駿奔若鳴騶當戶不  
忍去徘徊為人留對之成四支呼酒與獻醅我醉山自  
醒相忘却相求

埜踐得幽咏不吐聊自味健步忽傳呼云有遠書至開  
緘祇暄涼此外無一事奇懷坐消泯追省寧復記方驩  
遽成悶俗物真敗意山鵲下虛庭對語含喜氣一笑起  
振衣吾心本無滯

酒名忘憂物未盡酒所長醉後忘我身安得憂可忘我

飲初不多不可無一觴平生難為酒甘醴斷不嘗要與  
水爭色仍復菊敵香氣盡春午花味凜秋旭霜三杯合  
自然一滴詣醉鄉竭來困行役名酒安可常甘澹俱不  
擇芳冽那得將酒味何必佳一醉徑投床但今日可飲  
不醉亦何妨

山厯愁寡天沙征恨多地兩日行海濱雖近彌不至遐  
瞻道旁堠我進渠祇退大風來無隔午煥皎安避今夕  
范氏莊初覲三峯翠愈遠故絕瑕不多始足貴巉然半

几出蹙若一拳細輕霏澹晚秀隕照燿春媚翫久有餘  
佳繪苦未必似今夕勿掩扉月中對山睡

初四日晨炊橫翠亭

近看三峯失一峯其餘俱與昨來同多情橫翠亭前玉  
伴我同行兩日中

人日宿味田驛

破驛荒涼晚解鞍急呼重碧敵輕寒南中氣候從頭錯  
人日青梅已醃酸

登大鞋嶺望大海

杖屨千峯表波濤萬頃前  
瓊天吹不定銀地濕無邊  
一石當流出孤尖卓筆然  
更將垂老眼何許看風烟

晨炊叱馭驛觀海邊野燒

南海驚濤卷玉缸  
北山焚燒展紅幢  
山神海伯爭新巧  
併慰詩人眼一雙

海崖七里沙

大風吹起翠瑤山  
近看還成白雪團  
一浪攙先千浪怒

打崖裂石與君看

行人莫近岸邊行便恐波頭打倒人  
若道岼高波不到  
玉沙猶濕萬痕新

鮮魚潭登舟

船閣寒沙待晚潮行人舟子各相招  
銀山一朵三千丈  
隔海飛來對面銷

宿南嶺驛

巖手猶拳已箸長菊苗初甲可羹嘗  
山村富貴無人享

一路春風埜草香

茅花侶雪復如茸一望平原淺草中  
盡日向人揮玉麈  
知將何事語春風

初十日早炊蕉步得家書並家釀

潢池東定得西還病後途中竟鮮懽  
為許朝來有新喜  
庭幃一騎報平安

年年自漉雪前醅今歲無緣得一杯  
政是荒村愁絕處  
家中送得六尊來

惠州豐湖亦名西湖

左瞰豐湖右瞰江五峯出沒水中央峰頭寺寺樓樓月  
清殺東坡錦繡腸

三處西湖一色秋錢塘潁水更羅浮東坡原是西湖長  
不到羅浮便得休

正月十二日遊東坡白鶴峯故居其北思無  
邪齋真蹟猶存

詩人自古例遷謫蘇李夜郎並惠州人言造物因嘲弄



故遣各捉一處囚不知天公愛佳句曲與詩人為地頭  
詩人眼底高四海萬象不足供詩愁常將湖海賜湯沐  
僅僅可以當冥搜却令玉堂揮翰手為提椽筆判羅浮  
羅浮山色濃潑黛豐湖水光先得秋東坡日與羣仙遊  
朝發崑閬夕不周雲冠霞佩照宇宙金章玉句鳴天球  
但登詩壇將騷雅底用蟻穴封王侯元符諸賢下石者  
祇於千載掩鼻羞我來剝啄王粲宅鶴峯無恙江空流  
安知先生百歲後不來弄月白蘋洲無人挽住乞一句

猶道雪乳冰湍不當年醉裏題壁處六丁已遣雷電收  
獨遺無邪四箇字鸞飄鳳泊蟠銀鈎如今亦無合江樓  
嘉祐破寺風颼颼

解舟惠州東橋

南宦寧嗟北西歸敢再東猿聲雲樹月客枕露船風綠  
髮春全白蒼顏酒不紅莫憎愁與病留取伴衰翁

放船

岸岸人家住門門面水開老翁扶杖立穉子看船來一

夜鳴春雨諸灘漲綠醅順流行自快更著北風催

感興

行役忘衰暮逢春感物華一來梅嶺外三見木棉花山  
鹿寧遊市江鷗本卧沙紅塵無了日白髮未還家

夜泊曲灣

順流一日快舟行薄暮風濤特地生不是江神驚客子  
勸人早泊莫追程

曲灣放船

梅子成陰夾道周  
木綿吐焰滿江頭  
春來不是無桃李  
臘月花開夏落休

石灣雨作得鞏采若書約觀燈

昨暮顛風浪打頭  
那知今日得安流  
元宵不為遊人好  
細雨先供客子愁  
病骨支離妨酒琺  
詩仙招喚試燈毬  
書生薄命多磨折  
樂事良辰判却休

舟中望羅浮山

羅浮元不是羅浮  
自是道家古蓬丘  
弱水只知斷舟楫

葛仙夜偷來惠州羅浮山高七萬丈下視日月地上流  
黃金為橋接銀漢翠琳作闕橫瓊樓不知何人汗腳迹  
觸忤清虛浣寒碧天遣山鬼絕凡客化金為錢瓊為石  
至今石樓人莫登鐵橋不見空有名玉匙金鑰牢鑰局  
但見山高水泠泠我欲騎磨翳鸞鳳月為環珮星為從  
前驅子晉後安期飛上峯頭斷丹汞

南海東廟浴日亭

南海端為四海魁扶桑絕境信奇哉日從若木梢頭轉

潮到占城國裏回最愛五更紅浪沸忽吹萬里紫霞開  
天公管領詩人眼銀漢星槎借一來

題南海東廟

羅浮山如萬石鐘一股南走如渴龍雷奔電迅遮不住  
直抵海濱無去處低頭飲海吐絳霞舉頭戴著祝融家  
珠宮玉室水晶殿萬水一日朝再衙青山四圍作城郭  
海濤半浸青山脚客來莫上浴日亭亭上見海君始驚  
青山缺處如玉玦潮頭飛來打雙闕晴天無雲濺碎雪

天下都無此奇絕大海更在小海東西廟不如東廟雄  
南來若不到東廟西京未睹建章宮海神喜我著綺語  
為我改容收霧雨乾坤軒豁未能許小試日光穿漏句

鑷白

止酒愁無那哦詩意已闌鑷髭非急務也遣半時間

和鞏米若遊蒲澗

南中道是島夷居也有安期宅一區屐齒苔痕猶故蹟  
霓旌鸞佩已清都元戎解領三千騎勝日來尋九節蒲

萬壑松風和澗水鳴琴漱玉自相娛

船過靈洲

却緣野闊覺天低正值潮平苦槳遲洲嘴兩船歸別港  
岸頭數屋出疎籬江山慘澹真如畫烟雨空濛自一奇  
病酒春眠不知曉開門拾得一篇詩

近岸

十日都無一日晴牽船客子總無心一川黃犢朝朝飽  
岸草何曾減寸青



泊鴨步

江流自在水風輕  
雲去天來半欲晴  
兩岸東西三十里  
李花獨對隔江明

明發鴨步

兩歲春船各一時  
今年船快去年遲  
青山面目何曾改  
清曉看來別樣奇

過黃巢磯

黃巢磯與白沙灘  
只是聞名已膽寒  
自笑南來三換歲

一年一度犯驚湍

望清遠峽

刺船又入峽山間江水初平失惡灘道是峽山天下險  
老夫只作坦途看

舟人吹笛

長江無風水平綠也無鞞文也無轂東西一望光浮空  
瑩然千頃無瑕玉船上兒郎不耐閒醉拈橫笛吹雲烟  
一聲清長響徹天山猿啼月澗落泉更打羊皮小腰鼓

頭如青峯手如雨  
中流忽有一大魚  
跳破琉璃丈來許

近峽

望峽初愁遠  
當前忽不知  
如何船進處  
却在棹停時

清遠峽四首

峽水都是泉  
非雨元自足  
不知幾滴珠  
成此一川玉  
旁將山染翠  
仰為天寫綠  
何當雪月夜  
孤艇葦間宿

清晨霧雨重  
不敢開船門  
小窓試微啟  
逗入一船雲  
何曾燒龍麝  
香霏遶吾身  
身在雲水上  
何許覓點塵

清遠望峽山山脚無半里小舟行其間五日翠未已並  
馳兩蒼龍中夾一玉水送我到英州渠當自回轡  
誰開峽山寺正要避世喧深潭無來路斷岸有青天療  
饑摘山果擊磬煩嶺猿人跡今擾擾祇緣一漁船

光口夜雨

峽山清空峽雨急寒聲夜半蕭蕭發玻璃盆面跳萬珠  
一顆一聲清入骨夢中搔首起來聽聽來聽去到天明  
一生聽雨令頭白不識春江夜雨聲

出真陽峽

過盡危磯出小潭回頭失却石峰巉  
春寒料峭元無事知我猶藏一布衫  
細雨初來刺水紋三針兩綫未教繁  
不知忽有何忙處急灑千千萬萬痕

峽嶺分明是假山亂堆怪石入雲間  
上頭更種青瓊樹下照春江玉鏡寒

峽中出了又逢灘破浪牽船分外難  
只是峽中臨欲別

此灘留我再看山

江楓新染綠衣衫知費春風幾把藍道是春光在桃李  
試除桃李儘教參

入峽長思出峽行出來却憶峽中清一江碧水供詩硯  
兩岸青山作硯屏

只言英石冠南中未識真陽一兩峯遮莫陂陀將不去  
將詩描取小玲瓏

今歲春風漲又銷水痕猶印石間茅浮槎却被春流誤

長掛江邊小樹梢

春光濃裏更江行  
畫舫分明是水亭  
出了真陽恰惆悵

數峯如笋雨中青

出峽即見碧落洞數石峯

未必陽山天下窮  
英州窮到骨中空  
郡官見怨無供給  
支與真陽數石峯

山雲

春從底處嶺雲來  
日日山頭絮作堆  
戀着好峯那肯去  
欲開猶遶兩三回

碧落洞前灘水

水知山近已先狂  
箭往星奔趁下瀧  
灘下回流能耐事  
旋漚百轉看它忙

石峯背後即英州  
只不教人到岸頭  
羅帶春風吹不直  
故將數摺惱行舟

碧落峯前上一灘  
篙師叫得口都乾  
開門將謂船行遠  
只在峯頭蘆荻灣

北風



山雨無休歇江雲正鬱葱如何急灘水更著打頭風草  
作傷心碧花能可意紅一年春好處却在道途中

正月二十八日峽外見燕子

社日今年定幾時元宵過了燕先歸一雙貼水嬌無奈  
不肯平飛故仄飛

不宿青楓學子規不穿綠柳伴鶯啼雙飛只愛清江水  
自喜身輕點舞衣

回望峽山二首

英州挽不來峽山推不去行來一日船依舊朝來處  
浪喜出峽來山亦何曾出兩岸只無山依舊江到峽

碧落洞

碧落諸峯是碧簪忽於平地插瑤峯洞中定有神仙宅  
玉室金堂不可尋

夢中曾泊洞前船落絮飛花是去年今日來尋船泊處  
一江風雨草連天

洞裏仙人枉費功鑿山屈曲做神通千縈萬繞留江住

畢竟奔流入峽中

際會諸灘吼怒雷  
遭逢江勢更縈回  
今宵不到英州宿  
何用山雲送雨來

郎石峯

四旁不與衆山連  
特地孤尖出半天  
碧落諸峯非不好  
讓他郎石一峯先

正月晦日自英州舍舟出陸北風大作

北風吹得山石裂  
北風凍得人骨折  
南來何曾識此寒

便恐明朝又深雪今朝幸不就船行白浪打船君更驚  
只是山行也不好筇輿寸步風吹倒

英石鋪道中

一路石山春更綠見骨也無斤許肉一峯過了一峯來  
病眼將迎看不足先生盡日行山間恰如蟻子緣假山  
穿雲度水千萬曲此身元不離巖巒莫嫌宿處破茅屋  
四方八面森冰玉孤峯高絕連峯低圍者如廩尖如錐  
蒼然秀色借不得春風領入玉東西英州那得許多石

誤入天公假山國

神堂鋪前桃花

北江二月正春寒初見桃花喜未殘  
臘月潮州見桃李  
元來不作好春看

過陳公逕

去歲陳公逕裏行船中仰看愛松風  
只今身在松風裏  
下看江船西復東

江行十里厭船遲却喚籃輿踏路泥  
江水別來纔兩日

陳公逕下再相隨

驚鼻鋪前桃花

歸來長恐已春遲  
恰是東風二月時  
路上桃花亦懽喜  
為人濃抹濕胭脂

南華道中

清曉新晴物物熙  
小風淡日暖歸旗  
不堪回首南華路  
去歲梅花細雨時

騎吏歡呼不要嗔  
二千里外北歸人  
慙慙自掬曹溪水

淨洗先生面上塵

荔枝歌

粵犬吠雪非差事  
粵人語冰夏蟲似  
北人冰雪作生涯  
冰雪一窖活一家  
帝城六月日卓午  
市人如炊汗如雨  
賣冰一聲隔水來  
行人未喫心眼開  
甘霜甜雪如饜蔗  
年年窖子南山下  
去年藏冰減工夫  
山鬼失守嬉西湖  
北風一夜動地惡  
盡吹北冰作南電  
飛來嶺外荔枝梢  
絳衣朱裳紅錦包  
三危露珠凍寒泚  
火傘燒林不成水

北人藏冰天奪之却與南人銷暑氣

嘗瓜

病骨那禁暑衰年更作愁有風依舊熱初伏幾時秋  
瓜果誰新餉饒涎小忍休金盆井花水但看玉雙浮

風露盈籃至甘香隔壁聞綠搏甕一搗白裂玉平分蘇  
甃開冰段梅山失火雲老夫供晚酌不用辦羶葷

讀武惠妃傳

桂折秋風露折蘭千花無朶可天顏壽王不忍金宮冷



獨獻君王一玉環

聖筆石湖大字歌

有序

淳熙聖主錫宴臨遣端明殿學士參政臣范成大居守金陵觴次肆筆作石湖二大字賜之以寵其行臣成大刻石以碑本分侶小臣楊萬里敢拜手稽首敬賦長句

石湖仙人補天手整頓乾坤屈伸肘爾來化作懶卧龍  
簌弄珠璣漱瓊玖五雲萬里天九重玉皇深拱蓬萊宮

豈無九虎守閭闔北門半扉當朔風夜令雲師勅風伯  
鞭起卧龍湖底月湖水卷上天中央却煩北門護風雪  
仙人馭風乘綠雲玉宸殿上朝帝真帝將北斗酌天酒  
冰桃碧藕脯麒麟傳呼玉蜍吸銀浦點霜調冰澆月兔  
灑成羲畫河洛書白壁一雙浮雨露石湖二字天上歸  
奎星壁宿落山扉昭回下飾吳花草姑蘇臺前近太微  
詩人不直一杯水自是渠儂命如紙教人妒殺石湖仙  
手攬星辰懷袖底




誠齋集卷十八

謹案卷十七第十二頁前七行下轎行乘脚底穿  
按宋詩鈔乘作來

第十四頁後六行非烟非霧布游雲按宋詩鈔布  
游作亦非





總校官庶吉士臣張能照

校對官庶吉士臣陳文樞

謄錄監生臣周學淮

謄錄監生臣周燮

欽定四庫全書叢要

集部

誠齋集卷十九

二十

詳校官助教臣謝登雋



欽定四庫全書薈要卷一萬五千五百九十六

集部

誠齋集卷十九

宋 楊萬里 撰



詩

朝天集

淳熙甲辰十月一日擬省試萬民觀治象詩

魏闕春風裏王城曉日端三朝垂治象萬姓得榮觀老  
穉看如堵章程炳若丹九天新雨露一札妙龍鸞遠覽



周官舊重瞻漢詔寬歡聲將喜氣銷盡柳邊寒

仲冬詔追造朝供尚書郎職舟行阻風青泥  
東關催人赴赤墀北風攔我泊青泥會當老子有行日  
未信北風無住時

破籬外面即江流枯樹梢頭總客愁隔水遠山濃復淡  
殷勤點綴一川秋

江神風伯戰方酣北浪吹翻總向南未放人扶下江柁  
却教眼看上江帆

明發青泥衝雪刺船

冰棹風船雪滿蓬  
詩人醉卧水晶宮  
追程未到君休問  
且啟瓊窻看玉峰

碧玉波頭綠錦裯  
玉妃踏舞襪生塵  
先生竒觀誰分却  
不分孤舟獨釣人

紅玉麒麟永作灰  
自溫瓊液寫銀杯  
雪花萬片江千頃  
更欠人間底物來

過招賢渡

歸船舊掠招賢渡惡灘橫將船閣住風吹日炙衣滿沙  
嫗牽兒啼投店家一生憎殺招賢柳一生愛殺招賢酒  
柳曾為我礙歸舟酒曾為我消詩愁

三衢登舟午睡

午思昏昏不肯醒倦投竹枕睡難成曉然有夢疑非夢  
聽得人聲及水聲

望橫山塢

水面生風分外嚴竹根剝雪更新添六年不見橫山塢

茅屋東邊忽半尖

曉泊蘭溪

金華山高九天半夜雪裝成珠玉案  
蘭溪水清千頃強朔風凍作瑠璃缸  
日光雪光兩相射病眼看來忘南北  
恨身不如波上鷗脚指為楫身為舟  
恨身不如沙上雁蘆花作家梅作伴  
折綿冰酒未是寒曉寒真欲冰我肝  
急閉簞篷擁爐去竹葉梨花十分注

蘭溪解舟

兩岸千千萬萬峯  
看來冷白復寒紅  
人言雪嶺非銀嶺  
三日晴光曬不融

日開五色暖征裘  
雪滿羣山爽病眸  
道是詩人窮到骨  
暖邊爽裏放蘭舟

只愁灘淺閣行舟  
到得江深又不流  
水鳥避人飛不徹  
看他沒去看他浮

際晚江風刮面來  
曉寒已去却重回  
也知青女嫁滕六  
巽二何須強作媒

梳頭看可正平詩有寄養直時未祝髮等篇  
戲題七字

却因理髮得披文看盡廬山筆底春寄語可師休祝髮  
癩邊猶有去年痕

老子平生湯餅腸客間湯餅亦何嘗怪來今晚加餐飯  
一味廬山笋蕨香

暮泊鼠山聞明朝有石塘之險

下水船逢上水船夕陽仍更澁沙灘鴈來埜鴨却驚起

我與舟人俱仰看回望雲邊山已遠如何蓬底暮猶寒  
今朝莫說明朝路萬石堆心一急湍

夜泊釣臺小酌

牛狸送我止嚴陵黃雀隨人入帝城海錯未來鄉味盡  
一杯今夕笑先生

追和尤延之檢討入紫宸殿賀雪

錫山詩老立層霄黃竹賡歌宴在瑤有客夢中聞  
雪作曲肱蓬底信船搖

雪時余方解舟三衢

遙知瑞葉飄香

袖笑向梅花趁早朝未嘆山人負猿鶴負渠縮項  
與長腰

和陳蹇叔郎中乙巳上元晴和

御柳梢頭晚不風官梅面上雪都融如何閭闔新春夜  
頓有笑蕖滿眼紅十里沙河人最鬧三千世界月方中  
買燈莫費東坡紙今歲鼇山不入宮

十四日晚有旨  
徹禁中山棚

二月望日遞宿南宮和尤延之右司郎署踈  
竹之韵



此君見我眼猶青笑我吟髭雪點成憶昔與君同舍日  
聽渠將雨作秋聲夜來遮宿三更悄葉底春寒一倍生  
夢入故園數新笋穿籬破蘚幾莖橫

春寒早朝

十載江湖今又歸朝雞不許夙興遲每聞撲鹿初鳴處  
正是鬢鬆好睡時病眼生憎紅蠟燭燒光未到碧桃枝  
誰能馬上追前夢坐待金門放玉笄

二月二十四日寺丞田文清叔及學中舊同

舍諸友拉予同屈祭酒顏丈幾聖學官褚丈  
集於西湖雨中泛舟坐上二十人用遲日江  
山麗四句分韻賦詩余得融字呈同社

正月一度遊玉壺二月一度遊真珠是時新霽曉光初  
西湖獻狀無遺餘君王予告作寒食來看孤山海棠  
色海棠落盡孤山空湖上摹糊眼中黑夜來三更湖月  
明羣仙下墮嬉珠庭東坡和靖相先後李成郭熙在左  
右惠崇捧硯大如箕大年落筆疾於飛磨墨為雲灑為

雨湖波掀舞山傾欹畫作西湖烟雨障今晨掛在孤山  
上同來諸彥文章公不數錢起兼吳融何如玉船一舉  
百分滿一笑千峰烟雨散

類試所戲集杜句跋杜詩呈監試謝昌國察  
院

有客有客字子美日糴太倉五升米錦官城西生事微  
盡醉江頭夜不歸青山落日江湖白嗜酒酣歌拓金戟  
語不驚人死不休萬草千花動凝碧穉子敲針作釣鉤

老夫乘興欲東流  
巡簷索共梅花笑  
還如何遜在揚州  
老去詩篇渾漫與  
蛺蝶飛來黃鵠語  
往時文采動人主  
來如雷霆收震怒  
一夜水高數尺強  
濯足洞庭望八荒  
閭闔晴開眈蕩蕩  
安得仙人九節杖  
君不見西漢杜陵  
老脫身事幽討  
下筆如有神  
汝與山東李白好  
儒術於我何有哉  
願吹埜水添金杯  
馬知餓死填溝壑  
如何不飲令心哀  
名垂萬古知何用  
萬牛回首丘山重

予因集杜句跋杜詩呈監試謝昌國察院謝

大復集杜句見贈予以百家衣報之

棘闈深鑱武成宮華裾織翠青如蔥謝公文章如虎豹  
林間一嘯四山風天下幾人學杜甫千江隔兮萬山阻  
畫地為餅未必侶更覺良工心獨苦誰登李杜壇浩如  
海波翻蚤有二子成三人古風蕭蕭筆追還我詩如曹  
鄣拆東補西裳作帶令人還憶謝玄暉崑崙虞泉入馬  
蹄我願四方上下逐東望只有相逢無別離

楊花

只道垂楊管別離楊花一去不思歸浮踪浪跡無拘束  
飛到蛛絲也不飛

擬花藥亞枝紅詩

花密非無藥繽紛亂眼中千枝相亞開一色總成紅赴  
曉桃如積爭晴杏欲烘金鬚迷不見玉頰醉來同頓覺  
江山麗都將錦繡籠春光誰畫得分付少陵翁

四月五日車駕朝獻景靈宮省前迎駕起居  
口號

鳳輦雲行露未銷  
鸞旂風動柳烟高  
晴雷出地傳清蹕  
霽日吹紅染御袍  
喜見天顏浮玉藻  
歸從原廟薦櫻桃  
小臣再得瞻黃繖  
兩鬢星星不滿搔

沈虞卿祕監招遊西湖

蘇公堤遠柳生烟  
和靖園深竹映闌  
船入芰荷香處去  
人從雲水國中還  
似寒如暖清和在  
欲雨翻晴頃刻間  
能為蓬萊老仙伯  
一杯痛快吸湖山

陳蹇叔郎中出閩漕別送新茶李聖俞郎中

出手分似

頭網別樣建溪春小壁蒼龍浪得名細瀉谷簾珠顆露  
打成寒食杏花錫鷓鴣斑面雲縈字兔褐甌心雪作泓  
不待清風生兩腋清風先向舌端生

送鄉僧德璘監寺化緣結夏歸天童山

一別璘公十二年故當刮目為相看問儂收得曹溪水  
雲下春風吹已乾

七百支郎夜忍飢木魚閉口等君歸還山大衆空歡喜



只有誠齋二首詩

答提點綱馬驛丞劉脩武翰

公幹當年子建親  
景文今代大蘇賓  
絕知將種仍詩種  
不教騷人與外人

解道征鴻數字秋  
清於雪碗映冰甌  
老來筆底心無毒  
交割風光與子休

吳春卿郎中餉臘豬肉戲作古句

老夫畏熟飯不能  
先生饋肉香傾城  
霜刀削下黃水精

月斧斫出紅松明君家豬肉臠前作是時雪沒吳山脚  
公子彭生初解縛糟丘挽上凌烟閣却將一醵配兩螯  
世間真有揚州寫

戲作司花謠呈詹進卿大監郎中

靈君觴客滕王家黿頭仙人作司花仙人一笑春風起  
開盡仙源萬桃李李花冶白桃倡紅坐客桃霞李雪中  
仙人半酣舞造化風吹雨打千花空媽香菸色付一掃  
病蒼殘英又嫌老落花已對春風羞新花也對春風愁

姚黃魏紫世無種且據眼前桃李休

直宿南宮

獨直南宮午獨吟祥雲淡淡竹陰陰小風慢落鶯黃雪  
看到槐花一寸深

今年秋暑更禁它無計商量奈熱何一霎飄蕭涼一日  
雨來銷得幾多多

秋熱連宵睡不成移床換枕到天明今宵不熱還無睡  
却為宮簷瀉雨聲

大司成顏幾聖率同舍招遊裴園泛舟繞孤  
山賞荷花晚泊玉壺得十絕句

鳳城魚鑰曉開銀國子先生領縉紳山水光中金鑿落  
芙蓉香裏葛頭巾

小步深登野寺幽古松將影入茶甌鈴聲忽起九天半  
有埴危峯最上頭

岸岸園亭傍水濱裴園飛入水心橫旁人莫問遊何許  
只揀荷花開處行

船開便與世塵疎  
飄若乘風度太虛  
坐上偶然遺餅餌  
波間無數出龜魚

西湖舊屬野人家  
今屬天家不屬他  
水月亭前且楊柳  
集芳園下儘荷花

小泛西湖六月船  
船中人即水中仙  
外鋪雲錦千弓地  
中度瑠璃百摺天

城中擔上買蓮房  
未抵西湖泛野航  
旋折荷花剝蓮子  
露為風味月為香

故人京尹劇風流走送厨珍佐勝遊青李來禽沈

去聲

冰

雪黃金白壁斫螭蟬

人間暑氣正如炊上了湖船便不知湖上四時無不好  
就中最說藕花時

遊盡西湖賞盡蓮玉壺落日泊樓船莫嫌當處荷花少  
剩展湖光幾鏡天

謝胡子遠郎中惠蒲大韶墨報以龍涎心字

香

墨家者流老蒲仙碧梧採花和麝烟華陽黑水煎膠漆  
太陰玄霜作肌骨龍尾磨肌飲鼠鬚落點髭几几不如  
夸甫清瞳光敵日一見墨卿驚自失後來夔州有梁杲  
爾來黔州有吳老亦追時好得時名竟為蒲生豎降旌  
吳墨往往玄尚白梁墨濕濕稿黏壁南宮先生來自西  
惠然贈我四玄圭我無鵲返鸞迴字我無金章玉句子  
得君此贈端何似兀者得韓僧得髭安得玉案雙鳴璫  
金刀綉段底物償送以龍涎心字香為君興雲繞明窓

新涼五言呈尤延之

暑極無可增夏餘亦無幾幽人渴欲啗日日望秋至秋  
至涼不隨夏去熱未已一夕睡美餘秋從簾波起新涼  
來何方灑若清到髓夕前輕雨作雨後微風駛涼偶與  
之偕未必涼因此向來亦風雨既止暑更倍但令暑為  
涼老病有生意何必問所求亦莫悲徂歲

小齋晚興

不會隣家養鵲兒清晨齊放晚齊歸網絲到處縈人鬢



欲打蜘蛛揀最肥

尤延之和予新涼五言末章有早歸山林之  
句復和謝焉

投分詎云稀會心諒亡幾從君澹何奇與我凜獨至相  
逢情若忘每別懷不已偶因新涼篇令予懦全起藉草  
分澗芳陟巘共石髓松陰俯逝波不徐亦不駛平生還  
山約終食能忘此可憐各異縣千里復三倍它日寄相  
思百書那寫意從今可相踈却嘆日為歲

省宿題天官廳後竹林

秋聲偷入翠琅玕  
葉葉竿竿玉韻寒  
聲在樹間元未是  
秋聲只在竹林間

賀皇太子九月四日生辰

地出雷初震天昇日更重  
高飛千里鵠潛躍九淵龍  
隆準如高帝虬鬚侶太宗  
八荒陰賜裏戶戶是華封  
代邱躬仁儉湯孫世聖賢  
誰云無二日今恰見三天  
甲觀初寒夕神光侶晝然  
前星那解老何但八千年

重九吹花節千齡夢日時東朝分菊水南內賜萸枝禹  
酒無多酌堯樽更一卮三宮千萬壽剝費若干詩  
繼照姿天縱分陰學日勤橘中招綺夏瓜處屏伋文老  
別魚竿日來依鶴禁雲還將古為鑑聊當野人芹

和同年李子西通判

走馬看花拂綠楊曲江同賞牡丹香向來年少今俱老  
君拜監州我作郎北闕小遲蒼玉佩南征聊製芰荷裳  
病身只作家山夢徑菊詩葩雨就荒

九日都下黃雀食新

九日新霜薄羣飛一網遮  
裘披楊柳絮色染木犀花  
下箸欣鄉味知儂憶故家  
金杯浮菊蕊相映兩光華

九日即事呈尤延之

昨日茱萸未著香今朝籬菊頓然黃  
浮英泛蕊多多著舊酒新醅細細嘗  
節裏且追千載事鬢邊官得幾莖霜  
正冠落帽都兒態自笑狂夫老不狂

和周元吉左司東省培竹

雞省有貞植驚行銷畫煩憎柳媚綠暗伴梅耿黃昏何  
須雪貿貿始愛渠軒軒堅守孤竹國肯折先軫元如何  
桃李時筍短不出垣周郎夜入直挾策攜酒尊為渠問  
玄夫乃遇震為坤喜渠必蕃昌吟到落金盆曉喚郭橐  
駝提耳細細言汲水龍井泓輦土天竺原妙偷造化窟  
仁及冰霜根為賦淇澳詩絕去筆墨痕何時淮陰市能  
報漂母恩周郎顧之笑吾自哀龍孫

和周元吉左司夢歸之作

半似清狂半白癡不如人笑我心知烟霞平日真成癖  
山水中年却語離錯計浪隨雲出岫感君能遣雨催詩  
居然喚起還家夢橘刺藤梢隔槿籬

給事葛楚輔侍郎余處恭二詹事招儲禁  
同寮沈虞卿秘監諭德尤延之右司侍講何  
自然少監羅春伯大著二宮教及予泛舟西  
湖步登孤山五言

曉雨擣珠屑吹作空中塵拂水無落暈映巖有遮痕承

華兩端尹嘉招出城闌一尊澆雲師借風開畫昏諸鬟  
忽脫帽孤鏡亦捲袖西湖翳復皎南山洗如新舍舟步  
柳堤曳杖啄松門乃是小上林亦有虎守閤桂落賽金  
粟蓉粧濃綉屏高堂竹梢上幽榭荷葉濱羣仙此小憇  
呼酒領一欣秋花隔水笑笑我墮紗巾更醺不知籌互  
嘲還作春行樂戒多取況復仄羲輪歸髮兀頽玉那知  
醉與醒

賀皇孫平陽郡王十月十九日生辰

玉歷當千運天潢第一源本支堯百世有道宋曾孫接  
武前星曜依光太極尊年年會慶節更慶茁蘭蓀

送王成之中書舍人出使

帝遣唐朝第一人玉門關外賜金銀使星芒動梅花早  
漢月光垂塞草春故國山河迎詔旨中原父老識詞  
臣十分宣慰持金節歸為君王轉大鈞

李聖俞郎中求吾家江西黃雀醪法戲作醪  
經遺之



江夏無雙小道士一丘一壑長避世裁雲縫霧作羽衣  
蘆花柳綿當裘袂身騎鴻鵠太液池腳踏金螭攀桂枝  
渴飲南陽菊潭水饑啄藍田粟玉芝今年禾田秋大熟  
紫皇遣刈神倉穀一雙鳬鴈墮雲羅夜隨弋人卧茅屋  
賣身不直程將軍却與彭越俱策勲解衣戲入玉壺底  
壺中別是一乾坤水精鹽山兩岐麥身在椒蘭衆香國  
玉條脫下澡凝脂金叵羅中酌瓊液平生學仙不學禪  
剗心洗髓糟床邊諸公俎豆驚四筵猶得留候借箸前

昔為飛仙今酒仙更入太史滑稽篇

食蒸餅作

何家龍餅湏十字蕭家炊餅湏四破老夫饑來不可那  
只要鶻圖吞一箇詩人一腹大於蟬饑飽翻手覆手間  
湏臾放筋付一莞急喚龍團分蟬眼

早朝紫宸殿賀雪呈尤延之二首

雪花將瑞獻君王晴早銷遲應建章不肯獨清湏帶月  
猶嫌未冷更吹霜

雲妃月姊宴羣仙珠閣銀樓集玉鸞老子來看收不徹  
梅梢拾得水晶盤

擬乙巳南郊慶成二首

已醖方諸月底泉更昇燿火桂梢烟煩黃幄坐明金炬  
太紫虛皇下碧天玉輅旂常龍十二綉衣鹵簿虎三千  
萬人隨駕還闔闔看奪金雞雪柳邊

上瑞今年特地奇大田多稼與雲齊星沉析木天街北  
波靜崑崙渤海西帝在紫壇神在坎穹如蒼蓋月如

珪一人執玉千官肅萬馬和鈴不敢騎

代賀郊祀慶成二首

聖主勤民歲自豐德威懷遠塞塵空爵金裸鬯周茅屋  
瑄玉親郊漢竹宮已刺六經新作制却追三代與同風  
雞竿更需如天澤殿柳宸梅雪正融

天為君王幸泰禋飛靈疎雨淨香塵金波玉李浮蒼  
壁風馬雲車降紫旻萬寶豐年真上瑞八方和氣藹成  
春受釐未肯專宣室鴻號還將壽兩親

和周元吉左司郊祀慶成韻

八觚泰時六郊天一柱明堂再饗先日月旂常寒映雪  
冕旒珠玉暖生烟風回韶濩龍鱗外花覆貔貅鳳闕前  
喜溢天顏應未了又迎慶壽入新年

送章德茂少卿出使

雪後聞君策馬蹄長纓自請繫撐犁光華劍佩伊吾北  
彈壓風濤瀚海西漢苑秦關愁外眼邊花塞月醉中題  
歸來聽履星辰上誰道淮陰假鎮齊

借尚書

送詹進卿大監出宣城

今代稽山賀季真前身江左謝宣城向來詔策無雙手  
已逼雲霄尺五程銀杏木瓜分我否鴛鴦野鴨莫渠驚  
玉皇香案方虛佇看即徵黃侍紫清

和章德茂少卿拉館學之士四人訪王德脩  
提幹

西王南金價則同帝城相對落花風人如天上珠星聚  
談到尊中竹葉空白紵烏紗青寶玦紫鸞黃鵠碧梧桐

千齡此遇還孤往恨殺燈前欠老翁

送何一之右司出守平江

十年一別再從遊  
聿見魚書拜徹侯  
人物只今何水部  
風流不減韋蘇州  
白蘋洲上春傳語  
烏鵲橋邊草喚愁  
報政不應遲五月  
鶯花紫禁竚歸舟

送羅春伯大著提舉浙西

晁董聲名彼一時  
夫君下筆與渠齊  
承明厭直辭金馬  
英蕩非關訪碧雞  
山嶽動搖增氣色  
詔書宣布舞羣黎

歸期只在千秋節留賦蒼苔鳳掖西

德壽宮慶壽口號

淳熙丙午元日聖上詣東朝慶壽八秩積陰  
頓晴飛雪弄日聖孝昭格萬姓呼舞擬作口

號十解

長樂宮前望翠華玉皇來賀太皇家青天白日仍飛雪  
錯認東風轉柳花

清曉鞭聲出禁中驚開剌雨及殘風金鷄銜取紅鸞扇



飛上玻瓈碧海東

春色何須羯鼓催  
君王元日領春回  
牡丹芍藥薔薇朵  
都向千官帽上開

雙金獅子四金龍  
噴出香雲繞殿中  
太上垂衣今上拜  
百王曾有箇家風

帝捧瑤觴玉座前  
綵衣三世祝堯年  
天皇八十一萬歲  
休說莊椿兩八千

天父晨興未出房  
君王忍冷立風廊  
忽然鳴蹕珠簾

捲萬歲聲傳震八荒

花外班行霧外天何緣子細望龍顏小窺玉色真難  
老底用臞仙九轉丹

甘露祥風天上來今回恩數賽前回都將四海懽聲裏  
釀作慈皇萬壽杯

堯舜同時已甚都祖孫四世古今無誰將寫日摹天手  
畫作皇王盛事圖

甲戌王春試集英小臣曾是老門生蒼顏華髮鵷行裏

也聽鈞天九奏聲

題曹仲本出示譙國公迎請太后圖自肅天  
仗以下皆紀畫也

德壽宮前春晝長  
宮中花開宮外香  
太皇願神玉霄  
上都人久不瞻清光  
今晨忽見肅天仗  
翠華黃屋從天  
降一聲清蹕萬人看  
天街冰銷樓雪殘  
北來又有一紅  
繖八鸞三駢金轂  
端輦中似是瑤池  
母鳳鳥霞裳剪雲  
霧太皇望見天顏  
開萬國春風百花  
舞乃是慈寧太

母回鸞圖母子如初千古無朔雲邊雪旂脚濕御柳宮  
梅寒影踈向來慈寧隔沙漠倩鴈傳書鴈難託迎還驪  
馭彼何人魏武子孫曹將軍將軍元是一逢掖忽攘兩  
臂挽五石長揖單于如小兒奉歸慈輦如折枝功蓋天  
下只戲劇笑隨赤松蠟雙屐飄然南山之南北山北君  
不見岳飛功成不抽身却遣秦家丞相嗔

正月二十四日夜朱師古少卿招飲小樓看

燈

金華山志卷之九  
光射琉璃貫水精  
玉虹垂地照天明  
風流誰似朱夫子  
解放元宵過後燈

南北高峯醒醉眸  
市喧都寂侶岩幽  
君言去歲西湖雨  
城外荷聲到此樓

送劉孔章縣尉得官西歸

早宴黃花詣粉闥  
晚按春草染朝衣  
却提猛士弓彎月  
去掃封狐雪打圍  
綠鬢朱顏君勝我  
青春白日我思歸  
何時共淪青原茗  
下看江鷗來去飛

和陸務觀惠五言

官縛春無分髯踈雪更欺雲間墮詞客事外得心期我  
老詩全退君才句總宜一生非浪苦醬瓿會相知

雲龍歌調陸務觀

墨池揚子雲雲間陸士龍天憎二子巧言語只遣相別  
無相逢長安市上忽再值向來一別三千歲王母桃花  
落幾番北斗柄爛銀河乾雙鬟成絲絲似雪兩翁對面  
面如丹借問別來各何向渭水東流我西上金印斗大

直幾錢錦囊山齊今幾篇詩家不愁吟不徹只愁天地  
無風月君不見漢家平津侯東閣冠蓋如雲浮又不見  
當時大將軍公卿雅拜如星奔祇令雲散星亦散也無  
鹿登臺榭羊登墳何時與君上廬阜都將硯水供瀑布  
磨鎌更斫扶桑樹擣皮作紙裁烟霧雲錦天機織詩句  
孤山海棠今已開上巳未有游人來與君火急到一回  
一杯一杯復一杯管他玉山頽不頽詩名於我何有哉  
再和雲龍歌留陸務觀西湖小集且督戰云

我願身為雲東野化為龍龍會入淵雲入岫韓子却要  
長相逢作意相尋偏不值不知今年是何歲剡藤玉板  
贈一番廷珪烏丸灑未乾乃是故人陸浚儀詩骨點化  
黃金丹謂宜天祿貯劉向不然亦合雲臺上却令去索  
催租錢枉却清風明月三千篇夜裝明發走不徹半篙  
刺碎嚴灘月老夫不願萬戶侯但願與君酒船萬斛同  
拍浮老夫不怯故將軍但怯與君筆陣千里相追奔少  
陵浣花舊時屋太白青山何處墳二仙死可埋丘阜二



仙生可着韋布名挂廣寒宮裏樹非烟非雲亦非霧長  
使玉皇掉頭誦渠句詩府誰得玉笈開詩壇誰授黃鉞  
來留君不住君急回不道西出陽關無此杯西山金盆  
儘渠頽斯遊明日方懷哉

上巳日子與沈虞卿尤延之莫仲謙招陸務  
觀沈子壽小集張氏北園賞海棠務觀持酒  
酹花予走筆賦長句

東風吹我入錦幄海棠點注燕支薄不論宜雨更宜晴

莫愁傾國與傾城半濃半淡晚明減欲開未開最奇絕  
只銷一線日脚紅傾刻千株開絳雪偉哉詩人桑苧翁  
持杯酌酒澆艷釐坐看玉頰添醉暈為渠一醉何須問

再和

太空無碍不可幄顛風莫動花肌薄一春纔有一日晴  
帝里遊人爭出城青天如水綠烟滅晴與海棠成兩絕  
坐中賓主詩中仙開口揮毫俱玉雪清泉白石欠此翁  
若為挿脚鵝鷺鼓老眼作花花作暈多慙猿鶴頻相問

醉卧海棠圖歌贈陸務觀

帝城二三月海棠一萬株向來青女拉滕六戲與一撼  
即日枯東皇夜遣司花女手按紅藍滴清露染成片片  
淨練酥亂點梢梢酣日樹蓬萊仙人約老翁寄牋招喚  
陸龜蒙為花一醉也不惜就中一事最奇特海棠兩岸  
繡帷裳是間橫著雙胡床龜蒙踞床忽倒卧烏紗自落  
非風墮落花滿面雪霏霏起來索筆手如飛卧來起來  
都是韵是醉是醒君莫問好箇海棠花下醉卧圖如今

畫手誰姓吳

誠齋集卷十九

欽定四庫全書蒼苔要卷一萬五千五百九十七

集部

誠齋集卷二十

宋 楊萬里 撰

詩

朝天集

寒食雨中同舍人約遊天竺得十六絕句呈

陸務觀

遊山不合作前期便被山靈聖得知只等五更傾一雨

三更猶是月明時

筍輿衝雨復衝泥一徑深深只覺遲孤塔忽從雲外出  
寺門漸近報僮知

住山何敢望他僧只是遊山也不曾可惜一條杉檜路  
都將濕了不教行

破雨遊山也莫嫌却緣山色雨中添人家屋裏生松樹  
穿出茅簷却覆簷

小溪曲曲亂山中嫩水濺濺一線通兩岸桃花總無力

斜紅相倚卧春風

老檜如幢翠接連山茶作塔綠縈纏  
山僧相識渾相忘  
不到山中十五年

三峯小石一方池下有機泉仰面飛  
坐看跳珠復拋玉  
忽然一噴與簷齊

清遠溪中小閘頭遮攔溪水不教流  
山僧為我放一板  
澣雪奔雷怒未休

城裏哦詩枉斷髭山中物物是詩題  
欲將數句了天竺



天竺前頭更有詩

忽見金絲嫋綺䟽又驚寒食到來初不知折盡西湖柳  
插遍長安萬戶無

禪房寂寂水潺潺澗草岩花點綴間忽有仙禽發竒響  
頻伽來自補陀山

雨裏昏昏怨出郊晴時不出却誰教西湖北畔名園裏  
無數桃花只見梢

戶戶遊春不放春只愁春去不愁貧今朝道是遊人少

處處園亭處處人

若道尋春被雨催如何隨處雨三杯晚晴曉雨如翻手  
有底虧儂不好來

萬頃湖光一片春何須割破損天真却將葑草分疆界  
葑外垂楊屬別人

轎頂花枝儘開裝遊人未暮已心忙無端更被千株柳  
展取蘇堤分外長

和皇太子雨中賞梅花偶成

日到青宮分外長  
梅兼白雪一時芳  
儲皇更著瓊瑤句  
句句裏天葩別樣香

玉淵堂下一梢長  
倚賴春風歷衆芳  
妙句忽從天上落  
千花從此總無香

謝皇太子三月十九日召宴榮觀堂頒賜  
金杯禎羅

春草池塘太液旁  
水精宮殿牡丹香  
慙非綺里攀鴻翼  
也侍承華宴鳳莊  
玉唾銀鈎看落筆  
繡袍金碗拜盈相

迎門兒女牽衣袖搜得隨侯與夜光

餞趙子直制置閣學侍郎出帥益州分未到  
五更猶是春二十八字為韻得猶字

錦水花潭照碧油西清學士舊鰲頭隨身琴鶴如清獻  
治蜀功名更武侯無晚十行看暮召不應三峽隔辰猶  
垂楊管得人離別舞破春風勸玉舟

鑱宿省中心氣大作通昔不寐得兩絕句

酒病春愁恰併才更衝花信宿鸞臺睡鄉堠子無三里

玉漏聲聲只喚回

絕恨詩人浪許癡  
四更無睡只哦詩  
老鈴枕手眠窓底  
急雨顛風總不知

送王恭父監丞倅潼川

淡墨掄魁政少年  
蓬山壁水得詩仙  
集賢學士看文筆  
國子先生費酒錢  
濯錦江頭頻入夢  
桃花水面送歸船  
平分月色真聊爾  
不日來朝尺五天

題徐戴叔雙桂樓

遙憐天上桂華孤月中何不種兩株唐人此句真絕唱  
後來詩人半語無向來何夕秋風起吹脫廣寒雙桂子  
落向君家樓閣前種玉開花今幾年清宵雙影寫窻戶  
却兼月裏成三樹年年八月九月時黃金粟綴青瑤枝  
秋風吹香入月去風回却帶天香歸容齋仙人為作碑  
誠齋老人為作詩金墓玉兔已傳誦莫問姮娥知不知  
招陳益之李兼濟二主管小酌益之指蠶豆  
云未有賦者戲作七言益豌豆也吳人謂之

蠶豆

翠莢中排淺碧珠甘欺崖蜜軟欺酥沙瓶新熟西湖水  
漆樞分嘗曉露腴味與櫻梅三益友名因蠶蠶一絲絢  
老夫稼圃方雙學譜入詩中當稼書

初夏清曉赴東宮講堂行經和寧門外賣花  
市

剩雨殘風一向顛花枝酒殘雨無緣忽逢野老從湖上  
擔取名園到內前芍藥截留春去路鹿蔥札上夏初天

衆紅半霎聊經眼不枉皇州第二年

積雨新晴駕幸聚景園擬口號

帝心憂麥復憂桑一念通天轉雨暘  
五色日華銷積靄  
三春花草殿餘芳  
黃雲暖照天顏喜  
紅藥濃熏禁籞香  
見說都人爭出郭  
歡聲舞倦萬垂楊

跋陸務觀劍南詩藁二首

今代詩人後陸雲天將詩本借詩人重尋子美行程舊  
盡拾靈均怨句新  
鬼嘯猿啼巴峽雨  
花紅玉白劍南春



錦囊繙罷清風起吹仄西窓月半輪

劍外歸乘使者車  
淞東新得左魚符  
可憐霜鬢何人問  
馬用詩名絕世無  
彫得心肝百雜碎  
依前塗轍九盤紆  
少陵生在窮如蝨  
千載詩人拜蹇驢

新晴讀樊川詩

江妃瑟裏芰荷風  
淨掃癡雲展碧穹  
嫩熱便嗔踈小扇  
斜陽酷愛弄飛蟲  
九千刻裏春長雨  
萬點紅邊花又空  
不是樊川珠玉句  
日長淡殺箇衰翁

駕幸聚景晚歸有旨次日歇泊

身在長安夢故山故山未去且長安落紅滿地莫教掃  
新綠隔牆聊借看竹葉勸人行樂事榴花為我遣春寒  
賜休又得明朝睡不問三竿與兩竿

都下食筍自十一月至四月戲題

竹祖龍孫渭上居供儂樽俎半年餘斑衣戲綵春無價  
玉板談禪佛不如若怨平生食無肉何如陋巷飯斯蔬  
不須庾韭元脩菜喫到憎時始憶渠

醺醺

以酒為名却謗他冰為肌骨月為家借令落盡仍香雪  
且道開時是底花白玉梢頭千點韻綠雲堆裏一枝斜  
休休莫斷西莊柳放上松梢分外佳

早謁景靈宮聞子規

帝里都無箇裏寬苑深地禁到應難蔚然綠樹去天近  
上有子規啼月殘便覺恍如還故里不知聞處是長安  
野薔薇發桐花落孤負南溪老釣竿

南海陶令曾送水沈報以雙井茶

嶺外書來謝故人梅花不寄寄爐熏  
辦香急試博山火兩袖忽生南海雲  
苒惹鬚眉清入骨縈盈窻几巧成文  
瓊琚作報那能辦雙井春風輟一斤

沈水占城第一良占城上岸更差強  
黑藏骨節龍筋瘠斑出文章鷗翼張  
滾盡殘膏添猛火熬成熟水趁新湯  
素馨熏染真何益畢竟輸他本分香

以六一泉煮雙井茶

鷹爪新茶蟹眼湯松風鳴雪兔毫霜細參六一泉中味  
故有涪翁句子香日鑄建溪當退舍落霞秋水夢還鄉  
何時歸上滕王閣自看風鑪自煮嘗

謝人送常州草蟲扇

生怕炎天老又逢草蟲扇子獻奇功還將多稼亭前月  
卷盡西湖柳上風蚱蜢翅輕塗翡翠蜻蜓腰細滴猩紅  
舊時綠鬢常州守今作霜髯一秃翁

謝福建提舉應仲實送新茶

詞林應錫繡衣新天上茶仙月外身  
解贈萬釘蒼玉勝  
分嘗一點建溪春  
三杯大道醺然後  
七椀清風爽入神  
聞道閩山官况好  
何時乞得兩朱輪

嘗枸杞

芥花菰苓餞春忙  
夜吠仙苗喜晚嘗  
味抱土膏甘復脆  
氣含風露噀猶香  
作齋淡著微施酪  
茗茗臨時莫過湯  
却憶荆溪古城上  
翠條紅乳摘盈箱

幼圃

蒲橋寓居庭有刻方石而實以土者小孫子藝  
花窠菜於其中戲名幼圃

寓舍中庭劣半弓驚泥為圃石為墉瑞香萱草一兩本  
蔥葉燂苗三四鼓穉子落成小金谷蝸牛卜築別珠宮  
也思日涉隨兒戲一逕惟看蟻得通

同三館錢王恭父監丞分韵予得何字

去歲從遊泛綠波西湖今日又新荷生來長是歡悰少  
老去更堪離別多客裏送君留不住尊前為我飲無何

休休萬事付一醉為報驪駒未要歌

送伍耀卿監廟西歸

敬軒居士子胥孫河出崑崙學有源秋鷄屢看書襴表  
春風兩度對堯軒釣竿已拂珊瑚樹拄笏新霑雨露恩  
暫作祝融香火吏裹輪早晚到柴門

謝岳大用提舉郎中寄茶果藥物三首

瓷瓶蠟紙印丹砂日鑄春風出使家白錦秋鷹微露爪  
青瑤曉樹未成芽松梢鼓吹湯翻鼎甌面雲烟乳作花



金史四庫全書  
卷二十  
喚醒老夫江海夢呼兒索鏡整烏紗

右日鑄茶

新羅上黨各宗枝有兩曾參果是非入手截來花暈紫  
聞香已覺玉池肥舊傳飲子安心妙新擣珠塵看雪飛  
珍重故人相問意為言老矣只思歸

右紫團參

三韓萬里半天松方丈蓬萊東復東珠玉鍊成千歲實  
冰霜吹落九秋風酒邊膈膊牙車響座上須臾漆櫺空  
新果新嘗正新暑繡衣使者念山翁

右新松實

西府直舍盆池種蓮

飛空天鏡墮莓苔玉井移蓮旋旋栽坐看一花隨手長  
揆開半葉出頭來稍添菱荇相縈帶便有龜魚數往回  
剩欲遶池三兩匝數聲排馬苦相催

西府寒泉汲十尋深澆淺灑碧森森高花已照紅粧鏡  
小荅新抽紫玉簪鈿破尚餘新雨恨繖踈纔作半池陰  
西湖瘦得盆來大音情更伴詩人恐不禁

東宮講退觸熱入省倦甚小睡

承華下直直幾廷新暑熏人睡不成到得曲肱貪夢好

無端急雨打荷聲起看翠蓋如相戲亂走明珠却細傾  
歸路關心最涼處水風四面一橋橫

和周元吉省中新竹

青士何年下大荒羽儀禁省立如牆錦綳半脫娟娟玉  
粉節新塗拂拂霜帶雨小酣三日後出林忽喜一梢長  
今年秋閨防多暑剩供先生格外涼

題尤延之右司遂初堂

漫仕風中絮歸心水上鷗把茅新結屋藜杖舊經丘花

底春勾引燈前夜校讎何如添我住二老更風流  
詩瘦山如瘦人遐室更遐荒林庾信宅古木謝敷家醫  
國君臣藥逃名子母瓜只愁歸未得綠却白鷗沙

七字謝紹興帥丘宗卿惠楊梅

梅出稽山世少雙情知風味勝他楊玉肌半醉生紅面  
墨暈微深染紫裳火齊堆盤珠徑寸醴泉繞齒蔗為漿  
故人解寄吾家果未變蓬萊閣下香

越絕諸楊盛一時與儂瓜葛不曾知老夫自笑吾衰矣

此客何從夢見之也解過江尋德祖政緣作尹是丘遲  
渠伊不是南村派未分先驅事荔支

小桃

小桃着子可憐渠踈處全踈無處無併綴一梢三兩顆  
縋枝欲折沒人扶

送周元吉顯謨左司將漕湖北

君詩日日說歸休忽解西風一葉舟黃鸝樓中作重九  
水精宮裏過中秋職親六閣仍金馬喜入千屯看木牛

繡谷光華誰不羨一賢去國欠人留

又見周郎攜小喬武昌赤壁醉嬌嬈蜀江雪水來三峽  
吳苑風烟訪六朝秋月春花出肝肺新詞麗曲入笙簫  
歸來却侍金鑾殿好看霜毫映珥貂

彼此江湖漫浪翁相逢遮宿省西東兩窮握手論詩後  
一笑投膠入漆中臨水登山公別我青鞋布襪我從公  
貂裘已博江西艇只待黃花半席風

簡陸務觀史君編修

聞道雲間陸士龍  
釣臺絕頂嘯清風  
却將半掬催詩雨  
灑入山村作歲豐

員外治中高帝孫  
幕中何幸有詩人  
主人不減西湖長  
青眼無妨顧德麇

故人趙彥元願  
託翁歸故云

送王季德提刑寶文少卿

寶儲依舊接英游  
塋節何曾遠藻旒  
卿月使星銀漢曉  
繡衣綵服太湖秋  
豺當道上狐何問  
鷹擊霜前兔已愁  
火急平反供一笑  
紫荷玉笋待君侯

贈都下寫真葉德明

我昔山林人不識或疑謫仙或狂客仰看青天不看人  
醉裏那知眼青白一攜破硯入長安素衣成緇綠鬢班  
上林麒麟著野馬滄洲鷗鷺綴孔鸞漢官威儀既不入  
貴人樣灞橋風雪又不見詩人相不須覽鏡照清溪我  
亦自憎塵俗狀葉君着眼秋月明葉君下筆秋風生市  
人請畫即唾罵只寫龍章鳳姿公與卿肯來為予寫衰  
貌擲筆掉頭欣入妙相逢可惜遲十年不見詩翁昔年



少

初秋玩月

月華只是尋常月如何入秋頓清絕  
潑在中庭滿地水飛上寒窻一堂雪  
今宵無雨風亦無涼氣却如風雨餘  
九州四海幾人看作意獨來尋老夫  
仙人餐霞嚙朝日老夫不願受此術  
不如掇月入杯中酒浪月波供一吸  
老夫病肺怯清秋對酒不飲月莫愁  
老夫未眠月未落相伴且到三更頭

送孫檢正德操龍圖出知鎮江

潤州太守去明州誰寄長江萬里流  
難省却煩三語掾龍章卧護兩淮秋  
古來北府多名酒今復南徐說勝遊  
聊奉雙親小行樂即持荷橐侍宸旒

看花走馬紹興間彼此春風各少年  
黃甲諸儒今幾許白頭同舍省東偏  
昨宵歸夢月千里餘債欠君詩兩篇  
已乞閩山一窠闕老身只要早歸田

食雞頭子二首

江妃有訣煮真珠  
菰飯牛酥軟不如  
手擘雞頭金五色  
盤傾驪頷琲千餘  
夜光明月供朝嚼  
水府龍宮恐夕虛  
好與藍田餐玉法  
編歸辟穀赤松書

三危瑞露凍成珠  
九轉丹砂鍊久如  
鼻觀溫芳炊桂歇  
齒根熟軟剥胎餘  
半甌鷹爪中秋近  
一炷龍涎丈室虛  
却憶吾廬埜塘味  
滿山柿葉正堪書

跋尤延之左司所藏光堯御書歌

光堯太上皇帝御書西漢書列傳目下有璽文

曰帝錄臣表得之以示臣萬里謹拜手稽首作  
歌敬書於後

鸞臺長史老堊僧月前病鴈霜後蠅文書海裏袞不了  
黑花亂發雙眼睛故人同舍尤太史敲門未揖心先喜  
袖中傾下十斛珠五色光芒射窓几自言天風來帝旁  
拾得復古殿中雲一張向來太上坐朝罷勝日光風花  
柳暇浣花側理冰雪容宣城雞距針芒鋒天顏有喜聊  
小試西京書目供遊戲韓彭衛霍欣掛名舒向卿雲感

書字漢廷多少失意人九京寸恨不作塵一朝翻入聖  
筆底昭回之光喚渠起小臣濫巾逢掖行手抄考經不  
徹章何曾下筆寫史漢再拜恭覽汗透裳太史結廬伴  
鷗鷺錫山山下荆溪渡紅光紫氣燭天衢箇是深藏寶  
書處

賀皇太子九月四日生辰

恭遇皇太子殿下誕彌令辰謹齋沐吟成龍  
樓曲十解仰祝眉壽恭惟令慈俯賜采覽萬

里下情無任頌禱之至

日日龍樓問寢時  
雞人未動漏聲遲  
前星一點朝天帝  
只有清臺太史知

清賞堂中無管絃  
鳳山樓上有雲烟  
儲皇側畔何人侍  
黃卷團圞是聖賢

子晉吹笙未是仙  
阿丕橫槊少全篇  
小吟春著梅梢白  
一日東風四海傳

二聖多能似仲尼  
儲皇家學自庭闈  
銀鈎已有淳熙脚

玉句仍傳德壽衣

明河查上有仙翁  
犯月撞星到碧穹  
金闕東邊銀榜處  
大書天地長男宮

大安宮裏漆園椿  
子幹孫枝葉葉新  
今日四株高下碧  
相承一樣八千春

菊花潭上菊花開  
不是花潭是壽杯  
天賜生朝千斛水  
一年一斛送將來

禹子湯孫兼聖賢  
一身雙美古無前  
願陳萬國元良句

不用金梧玉粹篇

少陽拜賜太陽旁黃菊紅萸滿壽觴陽德重重在初四  
不須九日是重陽

光堯初御六龍天上直維參大火躔天意分明昌宋德  
誕辰三世總丁年

尤延之檢正直廬憲前紅木犀一小株盛開  
戲呈延之

水沉國裏御風歸粟玉肌膚不肯肥元是金華學仙子



新將柿汁染秋衣不應裝束追時好無乃清癯悔昨非  
為妒尤郎得尤物故將七字惱芳菲

送張定叟

直上雲霄未遣休分符京兆帝王州赤丸窟裏無白額  
碧落班中政黑頭兩地好官纔半武扁舟歸興恰中秋  
只應銀信從天降莫戀融峯與橘洲

紫巖衣鉢付南軒介弟曾同半夜傳師友別來真夢耳  
江湖相對各潛然但令門戶無遺恨何必功名在早年

君向瀟湘我閩粵寄書只在寄茶前

時予方上  
章乞閩漕

新寒戲簡尤延之檢正

逗曉添衣併數重隔晡刺熱尚斜紅秋生露竹風荷外  
寒到雲牕霧閣中半點暄涼能幾許古來豪傑總成空  
木犀香殺張園子雪嗅金梭欠兩翁

跋姜春坊梅山詩集

松風澗水打窓聲玉珮瓊琚觸眼明當畫如何挂秋月  
未春特地轉新鶯只消一卷梅山集幻出多般景物情

老子平生有詩癖為君焚却老陶泓

承華寮案集鴛鴦不減應徐讌魏園中有釣璜清渭叟  
向來授鉞少陵壇錦心繡口塞花草雪梳冰甌瀉肺肝  
身到梅山得梅魄老夫更借一枝看

早朝垂拱殿曉出東省

請外天難達留中日不遑烏啼金殿月鷺集玉堦霜出  
晚緣堂白歸時報錄黃來年六十一六十髮蒼蒼

跋京仲遠所藏楊補之紅綾上所作者色掀

蓬梅

朔雲暗天垂到地朔風裂山吹脫耳長江萬頃一艇子  
一夜雪寒不成睡詩翁曉起髣髴鬆縮頸微掀黃篋蓬  
夜來急雪已晴了東方一抹輕霞紅江梅的皪開獨樹  
蓬間截入梅尺許老榦新枝紫復青花瑤白玉鬚黃金  
滿身滿面都是雪梅雪却與霞爭明不知詩翁何處得  
霜鋸和雪和梅斲將去恐是并州快剪刀不然吳剛脩  
月斧下無根榦上無梢一眼橫陳梅半腰東省拈出寒

蕭蕭至今花頭雪未銷

秋山

梧葉新黃柿葉紅更兼烏白與丹楓只言山色秋蕭索  
綉出西湖三四峯

秋雨蚤作有歎

細雨澹無點安得更有聲如何却作泥亦能妨晨征宿  
昔忽過暄心知非堅晴何須暄晴極然後寒雨生寒暄  
使人覺妙物亦何曾翦翦自神妙無乃與物矜造物本

非作觀者或強名老夫近稍聾此事無暇聽平生感秋  
至此意今已平獨念老病身頗不耐夙興何時歸故園  
晏眠閑柴荆鳴雞亦不留好夢無吾驚他年憶此詩惘  
如宿酒醒思歸已可喜而况真歸耕

寄題王徠德修知縣成都新居

子美百花潭北莊君今占作詠歸堂山分劔閣雲根瘦  
江送蓬婆雪汗香漱石枕流紅錦浪浮家泛宅白鷗行  
何人夜誦相如賦給扎蘭臺看堵墻

左藏南庫西廡下紙閣負暄戲題

左帑火禁清寒非人間有也而庫官孔仲石段  
季承史伯載心匠天巧創一大閣不薪不炭暖  
亦非人間有予以小暘谷名之且賦絕句

水衡仙客任冰天雪嚙風餐更禁烟不是移來小暘谷  
老夫凍折兩詩肩

賀皇孫平陽郡王十月十九日生辰

恭遇皇孫節使郡王誕彌令辰謹齋沐吟成七

言律一首仰祝眉壽恭惟鈞慈俯賜采覽萬里  
下情無任祝頌之至

前星炳煥領孫星環拱中天日兩輪四葉重光同聖世  
千秋佳節近生辰本支秀茂旦復旦典學熙明新又新  
喜入威顏添一笑壽觴分賜一枝椿

白紵歌舞四時詞

春

人生春睡要足時海波可乾山可移珠宮宴罷曉星出



不是天上無鳴雞昨來坐朝到日落君王何曾一日樂  
上林平樂半蒼苔桃花又去楊花來

夏

四月以後五月前麥風槐雨黃梅天君王若道嫌五月  
六月炎蒸又何說水精宮殿冰雪山芙蓉衣裳菱芡盤  
老農背脊曬欲裂君王猶道深宮熱

秋

星芒欲滅天風急月輪猶帶銀河濕青女椎冰作冷霜

吹到璇閨飛不入  
苧蘿山下浣紗人  
萬妃無色祇一身  
嬌餘貴極醉玉軟  
強為君王踏錦裯

冬

祇愁窮牖雪作惡  
不道雪天好行樂  
玻瓈底回青春  
蒲萄錦外舞玉塵  
陽春一曲小垂手  
勸君一杯千萬壽  
今年斛穀才八錢  
明年切莫羨今年

行路難

君不見河陽花  
今如泥土昔如霞  
君不見武昌柳  
春作

金絲秋作帚人生馬耳射東風柳色桃花不長久秦時  
東陵萬戶侯華蟲被體腰蒼瓊漢初沛邑刀筆吏折腰  
如磬頭搶地蕭相歛初謁邵平中廷百拜百不應邵平  
後來謁蕭相故侯一拜一惆悵萬事反覆何所無二子  
豈是大丈夫窮通流坎皆偶爾搏扶未必賢槍榆華胥  
別是一天地醉鄉何曾有生死儂欲與君歸去來千愁  
萬恨付一杯

老夫少時不信老長笑老人恃年少如今老矣不笑人

却被少年開口笑少年何苦笑老人老人舊日顏如春  
興來百錢山墮玉醉後千篇筆有神自古聖賢皆白骨  
誰道今人不見古時月孔子盜跖俱塵埃杜陵老人安  
在哉

黃金築臺賜白璧車前八駟門列戟徹侯萬戶秩萬石  
珠戶玉房貯傾國傳呼一聲萬人開將軍相國天上來  
不知道旁雍門子已歎麋鹿登高臺雍門解遣孟嘗泣  
孟嘗不泣渠何急只知富貴如雲浮不知貧賤飢死寒

死愁不愁

長門陳阿嬌却要一生金屋貯嬌饒長信班婕妤却要  
一生紈扇從玉車妾心祇作專房地別人亦有承恩意  
妾心不肯着別人君心還肯如妾心春風秋月渾不管  
花落花開空自怨千秋萬歲一笑休月明空照古今愁  
造化小兒不耐閒阿兄阿姊一侶顛兩手雙弄赤白丸  
來來去去繞青天赤丸才向西山沒白丸又向東山出  
只銷三萬六千回雪色少年成皺鐵鐵色頭鬚却成雪

雙丸繞從地下復上天少年一入地下更不還日日喜  
歡能幾許況有煩惱無喜歡莫言酒不到劉伶坟上土  
劉伶在時一醉曾三年明珠一百斛更添百斛也只心  
不足侯印十九枚更添一倍也只眉不開先生笑渠不  
行樂世人莫笑先生錯

誠齋集卷二十

謹案卷十九第十八頁後一行雲妃月姊宴羣仙  
原本雲訛雪今改


第二十三頁前六行却遣秦家丞相嗔原本遣訛  
道據宋詩鈔改

第二十四頁後三行公卿雅拜如星奔按宋詩鈔  
雅作推

卷二十第十二頁前七行未變蓬萊閣下香按閣  
一本作闕







總校官庶吉士臣張能照  
校對官庶吉士臣陳文樞  
謄錄監生臣周燮